

# 1 IONI

## Ioni yana kiluma nagami.

Tutuyanina Ioni i ve'auvea de'e leta nagami i kilumi tovetumaganavo i miamianiga 'awalawa Eisia nageneye faifaidi. Tutuyanina 'wayneye Ioni i miamia Efeso.

Ioni yana nuanua 'ailuga. Tamu, Iesu 'ana tovetumaganavo i velu'ase'asedi bega Yaubada wata Natuna Iesu Keliso 'aisedi 'waidie i na tovofovo fa'alina. 'Akonadi Yaubada i nuakalikalieniga wata i lubwainedi ediavo i na nuakalikaliyedi. Wata tamu yana nuanua, i matakia 'waidie tove-vekavekali faifaidi. Tovekalinidi igodi i vo, Tomogoda nani sakoina, begaidi kebu 'ana fata Keliso i na vetomotoga ma tomogona 'ida bani'odi. 'Ana 'isa'isa mogitana tomotoga, siwe tomogona kebu tomogoda bani'odi.” Wata tovekalinidi yadi nuanua 'aseti nani 'atumaiotogina, we'e nuakalikali tamu nani-'avo'avovo, wata sauluva tonovidi kebu faifaidi i da nuanua. Tomotoganidi 'asa'aiana taunidi Keliso 'ana gaviavo, begaidi Ioni nuanuana yadi vekalinidi i na sivemagesedi ve tonovidi 'waidiega. Letanina 'ana 'idi side bani'odi.

Letanina inagena 'ana nuanua mogitana. 1:1-4

Sauluva magemagetadi wata sauluva dudubala kebu taiadi i da vesala. 1:5–2:17

I matakia Keliso 'ana gaviavo faifaidi. 2:18-29

'Ada fata ta na venua'ivina egavo Yaubada natunavo we'e egavo Seitani natunavo. 3:1–4:6

Yaubada nuakalikali lamuna bega natunavo i lubwainedi i na venuakalikali. 4:7–5:5

Iesu Keliso 'ana tolu'ivonavo 'aitonu, wata mia-vagata faifaidi. 5:6-21

**Keliso yada mia 'ivauna wata 'atumaina lamuna.**

**1** <sup>1a</sup> Ifwaidi Iesu yana tomata'aulelevo taiadi 'a miamiani, bega a kiluma a na vonemi. Tutuyanina Yaubada fwayafwaya wata

---

<sup>a</sup> 1:1 Ion 1:1-2,4

abama i 'idewadiga, yana Tokiavemageta taiadi i miamia, mulieta Tokiavemagetanina 'a 'iseni wata yana vona 'a nogai. Mogitana 'a 'isaotogi wata taunima 'a 'abitonovi. Taunina Yaubada yana nuanua matatabuna 'adi Tokiavemageta wata 'wainega mia 'ivauna wata 'atumaina ta veluagai. <sup>2</sup> Tutuyanina mianina lamuna i souyeni, 'ima 'a 'iseni begaidi 'a kiluma 'a lulu'ivona 'waimie. Tokiavemagetanina 'a vonevoneyeniga, taunina Keliso, basenadiotoga Tamada taiadi i miamia, siwe i mai bega 'wainega mia 'atumaina wata miamia-vagaina ta na veluagai. <sup>3</sup> Ava'ai 'a 'iseni wata 'a nogai 'a lulu'ivona 'waimie bega yama veiana Tamada wata Natuna Iesu Keliso taiadi 'omi wata bani'odi 'wa na veiana nika yada sosoana 'aitamogana. <sup>4</sup> A kiluma 'a na vonemi, bega yami veiana Tamada 'waineye i na vebwaika, taiadi ta na sososoana mogitana.

### Yaubada magemagetana.

<sup>5</sup> Ava'ai basenadi 'a nogai Keliso 'wainega, 'a lulu'ivona 'waimie, vonanina side bani'odi. Yaubada Magemagetana, kebu tamu sai'afo dudubala i da 'eno'eno 'waineye. <sup>6</sup> We'e 'ai'edi ta na vo, 'Ida Keliso enavo," siwe yada sauluva sakoidi, bani'odi ta miamiani dudubala 'waineye, yada vonanina vekali wata Yaubada yana nuanua tonovidi kebu ta da vematayakeyakedi. <sup>7</sup> Yaubada yana 'eba mia magemagetaotogina nageneye, wata bani'odi 'ai'edi ta na miamiaga yana magetanina nageneye ma yada sosoana ta na veveiaiana, wata Natuna Iesu, yada sakona 'aitamogana 'aitamogana i lekolekoadi dayagina 'wainega bega ta veve'atumai Yaubada mataneye.

<sup>8</sup> 'Ai'edi ta na vo, 'Ida kebu tosakonaga," taunida ta vevekalieda wata Yaubada yana nuanua tonovidi kebu i da 'eno'novi yada nuanua 'waidie. <sup>9</sup> We'e 'ai'edi yada sakona ta na lu'ivoneyediga Yaubada 'waineye, yada sakonanidi i na nuatavunidi wata i na 'ivevunavunagida bega ta na ve'atumai sauluva sakoidi 'waidiega. 'Ada fata ta na vetumagana yada sakona i na nuatavunidi, fai yana nuanua matatabuna tonovidi wata bani'odi basenadi i vona'awaufaufa. <sup>10</sup> 'Akonadi Yaubada i vona i vo, Tomotoga 'aitamogana 'aitamogana tosakona," we'e 'ai'edi ta na vo, 'Ida kebu tosakonaga," 'ana nogaya Yaubada yana vona ta awave'leve'eweni wata yana vona kebu i da 'eno'eno yada nuanua 'waidie.

### Keliso taunina 'ada to'aivaita.

**2** <sup>1</sup> Ekwavo, 'omi 'wa vetumagana Iesu 'waineye begaidi a ve'awana natuna 'waimie wata a nuakalialiemi. A vonevonemi bega kebu 'wa na sakonaga. We'e 'ai'edi tamu aitoi i na sakonaga, yada To'aivaita

<sup>b</sup> 1:2 Ion 1:14   <sup>c</sup> 1:5 1 Tim 6:16; Iem 1:17   <sup>d</sup> 1:6 1 Ion 2:4   <sup>e</sup> 2:1 Ibu 9:24

i miamia i vevelu'ui faifaida Tamada 'waineye, bega yada sakona i na nuatavunidi. To'aivaitanina Iesu Keliso, yana sauluva matatabuna tonovidi. <sup>2f</sup>Taunina, Yaubada yana nuasako 'waideye i tovibodeni bega ta veiana Yaubada taiadi wata 'wainega Yaubada yada sakona i nuatavunidi, siwe kebu 'aise'avadaga, wata tomia fwayafwaya matatabudi.

<sup>3</sup>Ai'edi Yaubada yana veimea matatabuna ta na vevematayakeyakediga, ta 'asetai mogitana 'ida Yaubada taiadi ta veiana. <sup>4g</sup>Ai'edi tamu tomogo i na vo, Yau Yaubada taiadi a veiana,” siwe yana veimea kebu i na vevematayakeyakediga, taunina tovekali wata Yaubada yana nuanua tonovidi kebu yana nuanua 'waineye i da 'eno'enovi. <sup>5-6h</sup>We'e 'ai'edi aitoi Yaubada yana vona i na vevematayakeyakediga, yana nuakalikali Yaubada 'waineye, nuakalikali mogitana. 'Ai'edi aitoi i na vo, Yau a tauyeku Yaubada 'waineye a miamia,” i lubwaineni 'asa'aiana bani'odi Iesu Keliso yana sauluva i na vetutuyamedia. 'Ai'edi i na vetutuyamediga, ta na 'asetai tomogonina mogitana Yaubada taiadi i miamia.

#### Veimea 'ivauna.

<sup>7i</sup>Ekwavo a na vonemi. Veimea de'e kebu 'ivaunaga, tuatuaina, kumanina basenadi 'wa 'asetai tutuyanina Iesu Valana 'wa nogai. Side bani'odi, ma emiavo 'wa na venuakalikali. Veimeanina tuatuaina ma 'ana 'asetai 'waimie. <sup>8j</sup>Siwe tutuya fuedi veimeanina bani'odi i veve'ivau wata ta 'asetai veimea mogitana fai Iesu Keliso i vematayakeyakeni, 'omi wata bani'odi. Veimeanina ta na vematayakeyakeni ma edavo ta na vevenuakalikaliga, sakona 'waideye bani'odi dudubala i mweamwea ma'itufa Keliso yana mageta mogitana i 'a'awaiaia.

<sup>9k</sup>Aitoi i na vo, Yau Keliso yana mageta nageneye a miamia,” we'e enavo ma fuedie Keliso 'waineye i miamiani i vedumwe'ai'aiediga, taunina bola dudubala 'waineye i miamia. <sup>10l</sup>We'e aitoi enavo i nuakalikaliedi, taunina Keliso yana mageta 'ana tomia, kebu 'ana fata tamu nani 'waineye i na be'u. <sup>11m</sup>Aitoi enavo ma fuedie Keliso 'waineye i miamiani i na vedumwe'ai'aiediga, taunina dudubala 'ana tomia. Fai dudubalanina nuana i 'ivegaugauya bega ava'aibe bei i nunagoga kebu i da 'asetaga.

<sup>12n</sup>Natukwavo a vonevonemi fai Yaubada yami sakona i nuatavunidi Iesu Keliso yana wafa 'wainega.

<sup>13</sup>Omi tama a vonevonemiga fai kumanina 'eba velamuyega i miavagata 'akonadi 'wa 'asetai mogitana.

---

<sup>f</sup> 2:2 Lom 3:25; Ion 1:29, 11:52    <sup>g</sup> 2:4 1 Ion 1:6,8    <sup>h</sup> 2:5 Ion 14:21,23; 1 Ion 4:12,17, 5:3; 2:6 Ion 13:15    <sup>i</sup> 2:7 2 Ion 1:5-6    <sup>j</sup> 2:8 Ion 1:9; Lom 13:12    <sup>k</sup> 2:9 1 Ion 3:10,15, 4:20  
<sup>l</sup> 2:10 Lom 14:13    <sup>m</sup> 2:11 Ion 12:35    <sup>n</sup> 2:12 1 Kol 6:11

We'e 'omi tubuvauvau iavetami a vonevonemi fai Seitani taunina Tosakona 'wainega 'wa vetoketoke.

<sup>14</sup>Natukwavo, a vonevonemi fai Tamada 'wa 'asetai mogitana.

We'e 'omi tama a vonevonemi fai kumanina 'eba velamuyega i mia-vagata 'akonadi 'wa 'asetai mogitana.

'Omi tubuvauvau iavetami a vonevonemi fai 'omi toketokemi, wata fai Yaubada yana Vona nuamie i 'eno'enovi, wata fai Seitani taunina Tosakona 'wainega 'wa vetoketoke.

**Fwayafwaya 'ana nuanua kebu nuami i na 'ewadi.**

<sup>15</sup>°Kebu nuanuaku 'ai'aiwabu nuami i na 'ewadiga, wata tomotoganidi fwayafwaya 'ana nuanua 'waidie bwaikina, yadi sauluva kebu 'wa na vetutuyamediga. 'Ai'edi aitoi fwayafwaya 'ana nani i na nuakalikaliediga, Tamada 'ana nuakalikasi kebu 'waineye i da 'eno'eno. <sup>16</sup>Nani fuei fwayefwayeye kebu Tamada 'wainega i da maiga. Bani'odi bunu 'ana nuagiva sakoidi, naninidi i 'ise'isediga nuanuadi bwaikina, wata nualaka taunidi yadi 'ai'aiwabu faifaidi. Naninidi kebu i da maia Tamada 'wainega, i mai de'e fwayafwaya sakoina 'wainega. <sup>17</sup>Fwayafwaya de'e sai'afoga i na 'a'ava, wata naninidi sakoidi tomotoga nuanuadi taiadi i na 'a'ava. Siwe egavo Yaubada yana nuanua i vevematayakeyakedi i na mia-vagata.

**Keliso 'ana Gavia.**

<sup>18</sup>°Natukwavo, tutuya 'eba ve'a'ava sai'afoga i na souyeni. 'Akonadi 'wa 'asetai nagami Keliso 'ana Gavia i na mai, igodi i na vo, Yau tauniku Keliso," mulieta tutuya 'ana 'eba ve'a'ava. Tutuya de'e 'akonadi Keliso 'ana gaviavo i sousouyedi begaidi ta 'asetai fwayafwaya de'e sai'afoga i na 'a'ava. <sup>19</sup>°Keliso 'ana gavianidi basenadi 'ada 'aila'a nageneye i miamiani, siwe kebu mogitana Keliso i da nuakalikalieni begaidi i baileda. 'Ai'edi tomotoganidi Keliso i da nuakalikalieniga, taiadi ta da miamiani 'ada 'aila'a nageneye, siwe i baileda bega ta 'asetai-atumaia matatabudi kebu 'ada 'aila'aga.

<sup>20</sup>Tobailanidi kebu nuanuadi Keliso, we'e 'omi Keliso yana 'anivelena 'Anu'anunu 'Atumaina 'akonadi i agemi, begaidi matatabumi Yaubada yana nuanua tonovidi 'wa 'asetadi. <sup>21</sup>Kebu 'wa da bavuyedi faifaina a da vonevonemi, fai 'wa 'asetadi Yaubada yana nuanua tonovidi begaidi

° 2:15 Lom 8:7; Iem 4:4 P 2:17 Mad 7:21 q 2:18 Mad 24:5,24; 2 Ion 1:7  
r 2:19 Fol 20:30

a vonevonemi. Yana nuanuananidi 'waidiega kebu tamu vekali i da sousouyeni.

<sup>22</sup> Aitoi i vonaga i vo, Iesu kebu Yaubada 'ana Venua'ivinaga," taunina mogitana tovekali, wata Keliso 'ana gavia fai Tamada wata Natuna i vedumwe'ai'aiedi. <sup>23</sup> 'Fai Yaubada Natuna i vedumwe'ubu'ubuseni, Tamada kebu i da labilabini. We'e 'ai'edi aitoi ma yana vetumagana taunina i tauyeni Yaubada Natuna 'waineye, Tamada i labilabini.

#### 'Anu'anunu 'Atumaina 'asa'aiana yada Tove.

<sup>24</sup> Iesu Valana 'wa nogaiga 'eba velamuyega, bega i lubwainemi 'wa na nunuave'avini. 'Ai'edi Valanina 'wa na nunuave'aviniga, Tamada wata Natuna taiadi 'wa na miave'itubama. <sup>25</sup> "Keliso taunina basenadi i vona'awaufaufa 'waideye tamu nani i na veleda. Naninina, mia 'atumaina wata miamia-vagaina.

<sup>26</sup> Keliso 'ana gaviavo igodi nuanuadi i na vekaliemi, begaidi de'e faifaiddi a kilukiluma 'waimie. <sup>27</sup> "We'e 'omi kebu tovenidi bani'odi, basenadi 'Anu'anunu 'Atumaina i agemi, Keliso yana 'anivelena. Keliso 'Anu'anununa nagemie i na miamiaga, kebu 'wa na vo, Aitoi i da ve 'waideye?" 'Anu'anununina nani matatabuna i veve 'waimie, yana ve tonovidi kebu tamu sai'afu i na vekaliemiga. Fai yana ve matatabuna tonovidi, begaidi i lubwainemi 'wa na vevematayakeyakedi Keliso taiadi 'wa na miave'itubama.

<sup>28</sup> "Natukwavo, vona mogitana nuanuaku Keliso taiadi 'wa na miave'itubama, bega tutuyanina i na souyeniga, kebu ta na bunumayaga, ma yada venuafoufa'ala ta na tovoi mataneyeye. <sup>29</sup> <sup>x</sup> 'Akonadi 'wa 'asetai Keliso yana sauluva tonovidi wata 'atumaidi. Begaidi i lubwainemi 'wa da 'asetai, egavo yadi sauluva tonovidi wata 'atumaidi, taunidi Yaubada natunavo.

#### 'Ida Yaubada natunavo.

**3** <sup>1</sup> "Wa na nuani Tamada yana nuakalikali bwaikaotogina 'waideye, fai i vo, 'Omi natukwavo." Mogitana 'ida natunavo. Tomotoganidi fwayafwaya 'ana nuanua 'waidie bwaikina Yaubada i bavuyeni, begaidi kebu i da 'asetada 'ida Yaubada natunavo. <sup>2</sup> <sup>1</sup> "Omi ekwavo a nuakalikaliemi. Vona mogitana tutuya de'e 'ida 'akonadi Yaubada natunavo, siwe naninidi 'atumaiotogidi 'awaie i na souyediga 'waideye kebu ta da 'asetai'atumaidi. Siwe nani 'aitamogana ta 'asetai. Tutuyanina Keliso i na souyeni, ta na vetuli nika 'ida Keliso bani'odi, fai bei ta na

<sup>s</sup> 2:22 Mad 10:32-33; 1 Ion 4:3; 2 Ion 1:7    <sup>t</sup> 2:23 Mad 10:32-33; Ion 5:23; 2 Ion 1:9

<sup>u</sup> 2:25 Ion 3:15, 6:40    <sup>v</sup> 2:27 Ion 14:26    <sup>w</sup> 2:28 1 Ion 4:17    <sup>x</sup> 2:29 1 Ion 3:10

<sup>y</sup> 3:1 Ion 1:12-13, 16:3    <sup>z</sup> 3:2 2 Kol 3:18; Fil 3:21

'isaotogi wata ta na 'asetai mogitana. <sup>3</sup>Egavo i vevetumagana 'awaie i na vetuli Keliso bani'odi, i totokemaigedi bega yadi sauluva 'atumai'avadi, Keliso yana sauluva bani'odi.

<sup>4</sup>Egavo i sakosakona, Yaubada yana veimea i geugeudi, fai sakona matatabuna Yaubada yana nuanua 'ana togeu. <sup>5</sup><sup>a</sup>We'e 'omi 'akonadi 'wa 'asetai Keliso kebu tamu sakona 'waineye, i mai bega yada sakona i 'ewayavuledi. <sup>6</sup><sup>b</sup>I 'ewayavulediga, begaidi egavo Keliso taiadi i miave'itubamaga kebu wata i na sakosakona. We'e egavo i sakosakona kebu Keliso i da 'asetai mogitana 'alo i da veianeni.

<sup>7</sup><sup>c</sup>Natukwavo, kebu nuanuaku tamu aitoi i na vekaliemiga. Egavo tutuya fueidi i vevesauluva 'atumaina wata tonovina, taunidi tomotoga 'atumaidi bani'odi Keliso. <sup>8</sup><sup>d</sup>Egavo i sakosakona, taunidi Seitani natunavo fai 'eba velamuyega Seitani tosakona. Yaubada Natuna yana mai lamuna side bani'odi. I mai bega Seitani yana folova i na ve'avaotogidi.

<sup>9</sup><sup>e</sup>Egavo i tubuve'ivau Yaubada yana 'aila'a faifaina kebu nuanuadi sakona-vebogi, fai Yaubada yana nuanua i 'eno'eno 'waidie. Kebu 'ana fata natunavonidi i na sakona-vebogi, fai i tubuve'ivau Yaubada 'wainega. <sup>10</sup>Bega Yaubada wata Seitani yadi 'aila'a 'ada fata ta na 'asetadi. Egavo nuanuadi sakona-vebogi wata kebu nuanuadi ediavo i na nuakalikaliwediga, ta 'asetadi kebu Yaubada natunavoga, taunidi Seitani yana 'aila'avo.

### Ma edavo ta na vevenuakalikali.

<sup>11</sup><sup>f</sup>Tutuyanina 'waineye Iesu Valana 'wa nogai i maiga 'asiau vonanina i 'eno'eno 'waimie, i vo, Ma edavo ta na vevenuakalikali.” <sup>12</sup><sup>g</sup>Kebu Adama natuna Keni, yana sauluva ta na salai. Keni yana nuanua bani'odi Seitani yana nuanua sakoidi, begaidi taunina taina i luvewafai. I luvewafaga lamuna fai i 'asetai taina yana sauluva 'atumaidi we'e taunina yana sauluva sakoidi. <sup>13</sup><sup>h</sup>Ekwavo, tomotoganidi fwayafwaya 'ana nuanua 'waidie bwaikina i vevedumwe'ai'aiemi, siwe kebu nuami i na voganidi fai tomotoganidi Keni yana sauluvayega i nunago. <sup>14</sup><sup>i</sup>Basenadi ta nunagoi wafaotoga 'ana 'edeamo, siwe 'akonadi ta 'idili mia 'atumaina wata miamia-vagaina ta veluagai. Ta 'asetai ta veluagai fai edavo ma fuedeye Keliso 'waineye ta miave'itubamaga ta nuakalikaliwediga. Egavo kebu i da nunuakalikaliga, bola i nunagoi wafaotoga 'ana 'edeamo. <sup>15</sup><sup>j</sup>Egavo ediavo i na vevedumwe'ai'aiwediga, siwe 'asa'aiana taunidi toluwewafa, we'e 'omi 'akonadi 'wa 'asetai kebu tamu toluwewafa 'waineye mia 'atumaina wata miamia-vagaina i da 'eno'eno.

<sup>a</sup> 3:5 2 Kol 5:21; 1 Fit 2:22-24   <sup>b</sup> 3:6 Lom 6:1-2,14   <sup>c</sup> 3:7 1 Ion 2:29   <sup>d</sup> 3:8 Ion 8:44  
<sup>e</sup> 3:9 1 Ion 5:18   <sup>f</sup> 3:11 Ion 13:34-35   <sup>g</sup> 3:12 Nag 4:8   <sup>h</sup> 3:13 Ion 15:18-19; Mad 5:11-12  
<sup>i</sup> 3:14 1 Ion 2:11   <sup>j</sup> 3:15 Mad 5:21-22

<sup>16</sup> <sup>k</sup>Nuakalikali mogitana 'akonadi Keliso i veda, taunina i tauyeni i wafa faifaida. Wata 'ida bani'odi, i lubwaineda taunida ta na tauyeda wafa 'waineye edavo tovetumagana faifaidi. <sup>17</sup> <sup>l</sup>'Ai'edi tamu tomogo 'ai'aiwabuna i na vo, Yaubada a nuakalikalieni," siwe umokaina iana i vewekowekomaga kebu i na 'ivaiseniga, 'ana 'isa kebu mogitana Yaubada i da nuakalikalieni. <sup>18</sup> Natukwavo, kebu ta na vonamoga ta na vo, Ekwavo a nuakalikaliemi," i lubwaineda ta na nunuakalikali mogitana, 'awada wata nimada 'waidiega.

**'Ai'edi ta na nuakalikali mogitana, Yaubada mataneye ta na sosoana.**

<sup>19-20</sup> <sup>l</sup>'Ai'edi ma yada nuakalikali ta na 'a'aivaita, ta na 'asetai 'ida mogitana Yaubada yana nuanua tonovidi 'adi tovetumatayakayaka. We'e 'ai'edi 'ada vebae 'waidie vita ta na lutonovi tamu yada sakona faifaina, siwe fai ta nunuakalikali mogitana nuafouda i na vatu Yaubada mataneye. Yaubada yana nuakalikali bwaikaotogina, 'ada vebaenidi kebu bani'odiga, wata nani matatabuna ta 'i'idewadiga i 'asetadi.

<sup>21-22</sup> <sup>m</sup>Ekwavo, 'ai'edi ta na vetumagana Yaubada yana nuakalikalinina 'waineye, ta na sosoana wata ma yada venuafoufa'ala Yaubada mataneye, wata ava'ai nuanuada ta na velu'uiga i na veleda. I na veledaga, fai yana veimea ta vevematayakeyakedi wata yana nuanua ta 'i'idewadiga faifaidi i sososoana. <sup>23</sup> <sup>n</sup>Yana veimeanina side bani'odi. Nuanuana ta na vetumagana Natuna Iesu Keliso 'waineye wata ma edavo ta na vevenuakalikali. Veimeanina kebu tulinaga, bani'odi basenadi Keliso i voneda. <sup>24</sup> <sup>o</sup>Egavo Yaubada yana veimea i vevematayakeyakedi, taunidi Yaubada taiadi i miave'itubama, wata Yaubada i labilabinidi. Ta 'asetai Yaubada taiadi ta miave'itubama, fai Keliso yana 'anivelena 'Anu'anunu 'Atumaina i ageda.

**'Anu'anunu mogitana wata 'anu'anunu-vekavekali.**

**4** <sup>1</sup> <sup>p</sup>Ekwavo, tomotoga fuei 'akonadi i tovoi i nagoi 'awalawa fuei 'waidie i vonavona i vo, Yau Yaubada yana Vona 'ana tolu'ivona." Fai fuei tolu'ivona-vekavekali, kebu yadi vona 'wa na vetumagana-matayo'oyedi, nagami 'wa na venua'ivina-'atumai, yadi vonanidi mogitana i maia 'Anu'anunu 'Atumaina 'wainega, 'alo taunidi yadi nuanuayega. <sup>2</sup> <sup>q</sup>Side bani'odi 'wa na venua'ivinedi 'ami fata 'wa na 'asetadi yadi vonanidi 'Anu'anunu 'Atumaina 'wainega, 'alo taunidi yadi nuanuayega. Egavo i na vonavonaga i na vo, Iesu taunina Yaubada 'ana Venua'ivina i vetomotogaotoga," yadi vona i mai Yaubada 'Anu'anununa 'Atumaina 'wainega. <sup>3</sup> <sup>r</sup>We'e egavo i na vonavona i na vo, Iesu kebu

<sup>k</sup> 3:16 Ion 13:1; 1 Tes 2:8 <sup>l</sup> 3:17-18 VeL 15:7; Iem 2:15-16 <sup>m</sup> 3:22 Mad 21:22

<sup>n</sup> 3:23 Ion 6:29, 13:34 <sup>o</sup> 3:24 Lom 8:9 <sup>p</sup> 4:1 Mad 24:11 <sup>q</sup> 4:2 1 Kol 12:3

<sup>r</sup> 4:3 2 Ion 1:7

Yaubada 'ana Venua'ivinaga, wata kebu i da vetomotogaotoga,”  
tomotoganidi Yaubada 'Anu'anununa kebu i da agediga, 'anu'anunu tulina  
i agedi. 'Anu'anununina i agediga Keliso 'ana Gavia, kumanina faifaina  
basenadi i vo, I na mai,” nika mogitana 'akonadi i mai fwayefwayeye.

<sup>4</sup>We'e natukwavo, 'omi Yaubada yana tomotoga, 'wa vetoketoke  
tolu'ivona-vekavekalinidi 'waidie. 'Wa vetoketokega fai 'Anu'anunu  
'Atumaina i agemi 'Anu'anununina toketokeotogina, 'anu'anunu sakoina  
fwayefwayeye kebu bani'odiga. <sup>5</sup>Tomotoganidi fwayafwaya 'ana nuanua  
'waidie bwaikina, tutuya fuei naninidi nuadi i 'ewadiga faifaidi i  
vonavona. 'Ifwaidi tomotoga, tomotoganidi yadi nuanua bani'odi, yadi  
vona nuanuadi fai fwayafwaya 'ana nani nuanuadi. <sup>6</sup>'We'e 'ida Yaubada  
yana tomotoga. Egavo Yaubada i 'asetai mogitana bonada i noganogai,  
we'e egavo Yaubada i baila, wata yada vona i baila. Naninina 'wainega  
'ada fata ta na 'asetai egavo 'Anu'anununa Tonovina 'wainega i vonavona,  
wata egavo 'anu'anunu-vekavekali 'wainega i vonavona.

#### Yaubada yana sauluva matatabuna nuakalikali.

<sup>7</sup>Ekwavo, 'akonadi a nuakalikaliemi, nuanuaku matatabuda ta  
na vevenuakalikali fai nuakalikalinina Yaubada 'wainega. Egavo  
tutuya fuei i vevenuakalikaliga, taunidi Yaubada natunavo wata i  
'asetai. <sup>8</sup>Fai Yaubada nuakalikali lamuna, begaidi egavo kebu i da  
nunuakalikaliga Yaubada i bavuyeni. <sup>9</sup>“Yaubada i nuakalikaliedaga 'ana  
'eba 'isa side bani'odi. Natuna tubu'eana i vetunei tomia fwayafwaya  
sakoida 'waideye, bega yana wafa 'wainega mia 'atumaina wata  
miamia-vagaina ta veluagai. <sup>10</sup>“Yada nuakalikali Yaubada 'waineye,  
nuakalikali sai'afo. Nuakalikali mogitana lamuna side bani'odi. Fai  
Yaubada i nuakalikalieda mogitana, Natuna i vetunei, i wafa faifaida  
bega Yaubada yana nuasako 'waideye i tovibodeni, wata yada sakona i  
nuatavunidi.

<sup>11</sup>“Ekwavo, fai de'e bani'odi Yaubada i nuakalikaliedaga, begaidi  
i lubwaineda ma edavo ta na vevenuakalikali. <sup>12</sup>“Kebu tamu aitoi  
Yaubada i da 'iseniga, siwe 'ai'edi ma edavo ta na vevenuakalikaliga,  
Yaubada taiadi ta na miave'itubama, wata yana nuakalikali i  
vevebwaika 'waideye bega nuakalikali mogitana.

<sup>13</sup>“Ta 'asetai 'akonadi Yaubada taiadi ta miave'itubama wata i  
labilabinida fai yana 'anivelena 'Anu'anununa i ageda. <sup>14</sup>“<sup>z</sup>Ima Yaubada  
Natuna 'a 'iseni bega 'a lulu'ivona 'a vo, Tamada Natuna i vetunei tomia  
fwayafwaya 'waideye, taunina 'ada To'ita'ita'i.” <sup>15</sup>Egavo i vonavonaga i  
vo, Iesu Yaubada Natuna,” taunidi Yaubada taiadi i miave'itubama, wata

<sup>s</sup> 4:5 Ion 15:19    <sup>t</sup> 4:6 Ion 8:47    <sup>u</sup> 4:9 Ion 3:16    <sup>v</sup> 4:10 Lom 5:8-10    <sup>w</sup> 4:11 Mad 18:33  
<sup>x</sup> 4:12 Ion 1:18    <sup>y</sup> 4:13 2 Kol 1:21-22    <sup>z</sup> 4:14 Ion 3:17



Yaubada i labilabinidi. <sup>16</sup> <sup>a</sup> Begaidi ta 'asetai Yaubada i nuakalikalieda, wata ma yada vetumagana ta tauyeda yana nuakalikalinina 'waineye.

Yaubada nuakalikali lamuna. Egavo i miamiani nuakalikalinina nageneye, 'asa'aiana Yaubada taiadi i miave'itubama wata Yaubada i labilabinidi. <sup>17</sup> Taiadi ta miave'itubamaga, yana nuakalikali i vevebwaika 'waideye, begaidi fwayafwaya 'ana 'eba ve'a'ava 'waineye ma yada venuafoufa'ala wata ma yada sosoana ta na tovoi mataneye. Kebu ta na kolologa, fai 'ida ta miamianiga fwayefwayeye Keliso bani'odi, yana nuakalikali mogitana 'waideye i 'eno'eno. <sup>18</sup> 'Ai'edi aitoi i na nuakalikaliedaga mogitana, kebu 'ada fata ta na kololoyeniga. Bani'odi Yaubada i nuakalikalieda mogitana, bega kebu ta na kololoyeni vematavuloga faifaina. 'Ai'edi egavo Yaubada i na kololoyeniga vematavuloga faifaina, taunidi 'waidie yana nuakalikali kebu i da vevebwaika.

<sup>19</sup> <sup>b</sup> Nagamidiotoga Yaubada i nuakalikalieda, begaidi 'ida ta nunuakalikali. <sup>20</sup> 'Ai'edi aitoi i na vo, Yaubada a nuakalikalieni," we'e iana tovetumagana i na vedumwe'ai'aieniga, yana vonanina, vekali. Iana i 'ise'iseni siwe kebu i da nuakalikalieniga, begaidi kebu tamu sai'afo i na nuakalikali Yaubada, kumanina kebu 'ana fata i na 'iseniga 'waineye. <sup>21</sup> <sup>c</sup> We'e Yaubada taunina yana veimea i yatoi 'waideye i vo, Egavo Yaubada i nunuakalikalieniga, i lubwainedi ediavo wata i na nuakalikaliedi."

#### Yada 'eba vetoketoke sauluva sakoidi faifaidi.

**5** <sup>1</sup> Egavo i na vetumagana Iesu taunina Keliso Yaubada 'ana Venua'ivina, taunidi Yaubada natunavo. Egavo Tamada i na nuakalikalieni, siwe 'asa'aiana 'akonadi Natuna i nuakalikalieni. <sup>2</sup> 'Ai'edi Yaubada ta na nuakalikalieniga, wata yana vona ta na vevematayakeyakediga, ta 'asetai wata natunavo ta nunuakalikaliedi. <sup>3-4</sup> <sup>d</sup> 'Ai'edi Yaubada ta na nuakalikalieni mogitana, yana nuanua i vonedaga ta na 'i'idewadi. Yana nuanuanidi kebu vitadi 'waideye, fai Yaubada natunavo 'aitamogana 'aitamogana 'ana fata i na vetoketoke fwayafwaya 'ana nuanua sakoidi 'waidiega. Ta vevetoketokega fwayafwaya 'ana nuanua sakoidi 'waidie yada vetumagana 'wainega. <sup>5</sup> <sup>e</sup> Egavo i na vevetoketokega, tomotoganidi i vetumagana Iesu taunina Yaubada Natuna, 'aiseotogidi 'adi fata i na vetoketoke fwayafwaya 'ana nuanua sakoidi 'waidie.

<sup>a</sup> 4:16 Ion 6:69 <sup>b</sup> 4:19 1 Ion 4:10 <sup>c</sup> 4:21 Mad 5:44-45; Mak 12:29-31  
<sup>d</sup> 5:3 Ion 14:15,23-24; Mad 11:30; 5:4 Ion 16:33 <sup>e</sup> 5:5 Lom 8:37

**Nani 'aitonu i lu'ivona Iesu Keliso faifaina.**

<sup>6</sup>fIesu Keliso kumanina i mai abamega, i miamia fwayefwayeye bafitaiso i 'ewai ufayega, mulieta yana wafa 'waineye dayagina i ilolo faifaida. Yada 'eba 'isa 'ailuga. Kebu ufa'ava 'aisena, siwe wata dayaga taiadi. Wata 'Anu'anunu 'Atumaina i lulu'ivona Iesu taunina Yaubada Natuna, 'Anu'anununina nani tonovidi matatabuna lamudi. <sup>7</sup>gBegaidi naninidi 'aitonu Iesu Keliso faifaina i lu'ivona. <sup>8</sup>Ufa, dayaga, wata 'Anu'anunu 'Atumaina, 'aitonunidi yadi nuanua 'aitamogana, Iesu taunina Yaubada Natuna. <sup>9</sup>h'Eba vonayavuga 'waineye, to'isa yadi vona faifaidi ta awavemogitana, we'e Yaubada yana lu'ivona toketokeotogina, begaidi i lubwaineda ta na vetumagana Yaubada yana lu'ivonanina 'waineye, Natuna faifaina. <sup>10</sup>iEgavo i vevetumagana Yaubada Natuna 'waineye, Yaubada yana lu'ivonanina i 'eno'eno nuadie, yadi vetumagana i kiavefa'alidi. Egavo Yaubada yana vonanina Natuna faifaina kebu i da vetumaganeniga, yadi nuanua i vo, Yaubada i vevekali.” <sup>11</sup>Yaubada side bani'odi i voneyedi. Mia 'atumaina wata miamia-vagaina Yaubada i veleda, yada mianina 'atumaina ta veluagai Natuna 'wainega. <sup>12</sup>jEgavo Yaubada Natuna taiadi i miave'itubama, mia 'atumaina wata miamia-vagaina 'akonadi i veluagai, we'e egavo kebu taiadi i da miave'itubamaga, kebu 'adi fata i na veluagai.

**Mia 'atumaina wata miamia-vagaina faifaina.**

<sup>13</sup>k'Omi kumanimiavo 'wa vetumagana Yaubada Natuna 'waineye, de'e a vonevonemi bega 'wa na 'aseta-'atumaia 'akonadi mia 'atumaina wata miamia-vagaina 'wa veluagai. <sup>14</sup>l'Ida kebu ta da kololo Yaubada mataneye, ta venuafoufa'ala fai ta nuani mogitana 'ai'edi naninidi nuanuana faifaidi ta na velu'ui, yada velu'uinidi i na nogaidi. <sup>15</sup>Fai ta 'asetai yada velu'ui i noganogaidi, wata ta 'asetai naninidi faifaidi ta velu'uiga i na veleda.

<sup>16</sup>m'Ai'edi aitoi iana tovetumagana i na 'iseni sauluva sakoina i na 'i'idewai, siwe sauluvanina 'wainega kebu wafaotoga i na souyeni, i lubwaineni faifaina i na velu'ui. Yana velu'uinina 'wainega tomogonina yana mia Yaubada i na 'ive'ivauya. Sakonanidi 'waidiega kebu wafaotoga i na souyeni 'aisedi faifaidi a vonavona. We'e 'ai'edi aitoi tamu sakona bwaikina i na 'idewai, sakonanina 'wainega wafaotoga i na souyeni, kebu faifaina a da vonavona. <sup>17</sup>Sauluva matatabuna kebu tonovidiga 'asa'aiana sakona, siwe sauluvanina sakoidi 'ifwaidi 'waidiega wafaotoga kebu i na souyeni.

f 5:6 Ion 1:29-34 g 5:7 Ion 15:26 h 5:9 Ion 5:32-37, 8:18 i 5:10 Gal 4:6  
j 5:12 Ion 3:36 k 5:13 Ion 20:31 l 5:14 Ion 14:13 m 5:16 Mad 12:31

<sup>18</sup> <sup>n</sup>Yaubada natunavo ta 'asetadi kebu tamu i da sakosakona fai Yaubada Natuna i 'i'ibababaledi bega Seitani kebu 'ana fata i na 'abitonovidi. <sup>19</sup> Ta 'asetai tomotoganidi fwayafwaya 'ana nuanua 'waidie bwaikina Seitani yana nuanua sakoidi i veveimeyedi, we'e 'ida Yaubada natunavo. <sup>20</sup> <sup>o</sup>Wata ta 'asetai Yaubada Natuna i mai nuada i kiavemagetadi bega Yaubada, kumanina nani matatabuna tonovidi lamudi ta 'asetadi. Bega 'asiau ta miave'itubama Yaubadanina taiadi fai ta miave'itubama Natuna Iesu Keliso taiadi. Yaubadanina 'aiseotogina i miamia, kebu tamu wata aitoi Yaubada mogitana bani'odi, wata taunina mia 'atumaina wata miamia-vagaina lamuna.

<sup>21</sup> <sup>p</sup>Ekwavo a nuakalikaliemi. Nuanuaku taunimi 'wa na 'i'isave'avinimi bega kebu tamu yaubada-vekavekali nuami i na 'ewadi.

'Asa'iana bani'odi,  
Yau Ioni.